



10-06-2015

Inatsisartut suleriaasianni § 37 naapertorlugu Naalackersuisunut imaattunik apeqquteqarpunga:

- 1. Naalackersuisut nunani tamalaaneersunik ilisimasalinnik inuttalimmik aatsitassarsiornermi siunnersuisoqatigiinnik qaqugu pilersitsiniarpat?**
- 2. Siunnersuisoqatigiit suliassaat sunaassava? Aatsitassarsiornerup pilersikkiartuarneqarnerani aalajangiinerillu aqutseriaatsillu naapertuutinnigitsut pisinnaanerisa annikillisarinnissaanni Naalackersuisut siunnersorneqarnissaannik ilaatigut suliaqassava?**
- 3. Siunnersuisoqatigiit 2016-imut aningaasanut inatsimmi pingaarnertut pineqarpat, aningaasallu qanoq amerlatigisut pineqarpat?**
- 4. Siunnersuisoqatigiit pingaarnertut sutigut piginnaasaqartuussappat?**
- 5. Siunnersuisoqatigiit suliaasa politikkimut attuumassuteqartuunnginnissaat Naalackersuisunit qanoq qulakkeerniarneqarpa?**

(Inatsisartuni ilaasortaq, Naaja H. Nathanielsen)

Tunngavilersuut

Naalackersuisoqatigiit isumaqatigiissutaanni allassimavoq nunanit tamalaaneersunik inuttalimmik siunnersuisoqatigiinnik aatsitassarsiornermi siunnersuisartussanik pilersitsisoqassasoq.

Upernaaq manna ataatsimiinnermi ilaasortaqaterput Sara Olsvig peqatigalugu siunnersuuteqarsimagaluarput politikkimut attuumassuteqanngitsumik aatsitassarsiornermi siunnersuisoqatigiinnik pilersitsisoqassasoq. Siunnersuuterpulli akuerineqanngilaq. Naalackersuisut isumaqarput siunnersuisoqatigiit taamaattut aatsitassarsiorfinni toqqissisimannnginnermik pilersitsissasut taamatullu Naalackersuisut oqartussatut akisussaaffeqarnerannik atorunnaarsitsissasoq. Sara Olsvigilu oqallinnermi arlaleriaqaluta oqaatigivarput ataatsimiititaliap sulinermigut allannguutissatut siunnersuutissaannut assut ammalluta. Naalackersuisoqatigiit isumaqatigiissutaat aallaavigalugu pisap iluani isumaqatigiittoqarsinnaassasoq isumaqaralaratta. Tamannalu aallaavigalugu Naalackersuisut aatsitassarsiornermi siunnersuisoqatigiinnut tunngatillugu isumaliutaannut, tamassumalu qaqugu pilersinneqarnialersaarnertut tunngasunik tusagaqarusuppunga.

Apeqqutima ullut sulffiusut qulit iluanni akineqarnissaat kissaatigivara.